

# TEZAU LITURGIC

## 7 DECEMBRIE

# ACATISTUL SF. CUVIOS NIL DE LA STOLOBENSK



MOSCOVA, 2000



# **Акафист**

## **святому преподобному Нилу, Столобенскому чудотворцу**

### **Кондак 1**

---

Избранному от пелен в воинство Христово и  
вписанному от юности в книгу живота вечного,  
дивному в чудесах, преподобному отцу нашему  
Нилу, вси, насыщающиеся чрез него  
подаваемых неоскудно Божиих дарований,  
сошедшися воспоем ему, яко ходатаю и  
молитвеннику о душах наших, в веселии  
глаголюще:

Радуйся, преподобне отче Ниле, Столобенский  
чудотворче.

### **Икос 1**

---

Ангела Господь Своего посла к тебе,  
преподобне отче, возвестити, егда узре твое  
мудрование о небесных, дабы прешел еси из  
прежняя пустыни во оную, в нейже подвизался  
еси; ты же ни места, ни страны оныя ведая, но  
паче на Пославшаго тя Господа уповая и веруя,  
яко пернатый потекл еси в ню. Мы же, чада

твоя, аки на пути ты сретающе, приветствуем,  
сие возглашающе:

Радуйся, послушания нам образ оставивый;

Радуйся, любви ради Христовы вся красная  
мира сего за уметы вменивый.

Радуйся, Мелхиседеку подобен явивыйся;

Радуйся, яко ты родителей земных утаил еси  
от нас, да Небесному Отцу в сыновство  
причтешися.

Радуйся, яко за лишение сродства и  
дружества стяжал еси с небесными содружество;

Радуйся, преподобне, возненавидевый мира  
сего всякое наслаждение.

Радуйся, яко за сие восприял еси небесныя  
жизни учреждение;

Радуйся, преподобне, послуживый Господу  
преподобием и правдою.

Радуйся, за сие от Него почтенный честию и  
славою вечною;

Радуйся, в подвизех дневных и ночных  
течение жизни временныя совершивый.

Радуйся, в невечернем дни Царствия Божия  
присно пребываяй;

Радуйся, тех благих, ихже око не виде и ухо не слыша, вечный наследниче.

Радуйся, преподобне отче Ниле, Столобенский чудотворче.

## **Кондак 2**

---

Видев показанное ти Богом место, преподобне отче Ниле, возрадовался еси о красоте его; от радости же, яко не презре Господь Бог трудов твоих, сия благодарным гласом восклицал еси: О Троице Пресвятая, едина в Божестве в триех Лицах нераздельная, Боже Отче Всемогуший, Боже Сыне Единородный, Боже Душе Утешителю, светозарный миру свете, наставниче и промыслителю всех спасения, даруй мне до конца жизни моея на сем месте выну воспевати Тебе песнь: Аллилуия.

## **Икос 2**

---

Разум весь углублен имея, преподобне отче, в поучении о блаженной вечности и в ню водворитися желая, непрестанно со Давидом вопил еси: увы мне, яко пришельствие мое продолжися, быша бо слезы моя мне, яко хлеб,

день и ночь. Мы же таковому мудрованию  
твоему дивящися, вопием:

Радуйся, преподобне, земное мудрование  
Божественней воли повинувый;

Радуйся, желание твое ко Владыце, Христу  
Господу, всячески утверждение имевый.

Радуйся, крилами Богомыслия сети вражия  
сокрушивый;

Радуйся, вся его злобная на тя умышления до  
конца посрамивый.

Радуйся, оставивый привременныя имения и  
возлюбивый нищету Христову;

Радуйся, яко ныне за сие достигл еси к  
вечному и неистощимому Его богатству.

Радуйся, во умерщвлении страстей даже до  
конца жизни твоея неусыпно бодрствовавый;

Радуйся, смертью временною к вечному  
безсмертию прешедый.

Радуйся, за глубокое смирение в вечныя  
кроны вознесенный;

Радуйся, в неприступней славе получивый  
причастие.

Радуйся, всякия добродетели себе самаго образ нам явивый;

Радуйся, яко за сие ныне во Царствии Небеснем велий наречен еси.

Радуйся, преподобне отче Ниле, Столобенский чудотворче.

### **Кондак 3**

---

Сильна и непреборима тебе показал еси, преподобне отче, древнему врагу и завистнику блаженства нашего: егда бо зря тебе он, яко день от дне лествицу добродетелей к небеси незыблему утверждаеши, и человек плотян, но яко ангел безплотный житие проходиши, умысли от благословеннаго ти Богом места отдалити, различными привидении устрашаше тя; ты же вся его коварства, аки паучинныя сети, бодренною молитвою разгнал еси, яко не смети ему и издавеча на тя взирати, егда слыша тя поюща: Аллилуия.

### **Икос 3**

---

Имея несумненную надежду о спасении твоём, преподобне отче Ниле, ко исходу от жизни сея всегда готов был еси, и выну имея в памяти смерть, прежде оныя многотрудному

своему телу место своим руками изготовил еси.  
Мы же, чада твоя, аки надгробную песнь поем  
ти, сице глаголюще:

Радуйся, труды твоя и подвиги иноческие  
изменивый вечным упокоением;

Радуйся, страстей мглу истребивый.

Радуйся, облеченный ныне в ризу  
безстрастия;

Радуйся, ангельски на земли житие поживый.

Радуйся, ко граду нетленного Едема  
прешедый;

Радуйся, предстояния у страшного Престола  
Владычня сподобивыйся во славе вечней.

Радуйся, усердно возлюбивый заповеди  
Христа Господа;

Радуйся, яко друг честен и сам от Него  
возлюблен еси.

Радуйся, многи скорби с великим  
благодарением претерпевый;

Радуйся, в неизглаголанную радость Господа  
своего восприятый.

Радуйся, яко даровася тебе от Бога во  
благословениях прославляему быти;

Радуйся, яко слава твоя от человек всегда ублажается.

Радуйся, преподобне отче Ниле, Столобенский чудотворче.

### **Кондак 4**

---

Бурею помышлений неверных о тебе, преподобне отче, неистовии человецы смятошася, мняще, аки бы не ради любви Христовы толь жестокий пустынный путь проходил еси, но выну уединеннаго жития твоего непщеваху быти стяжание имения, чесо ради и окрасти тя умыслиша; но вместо чаемаго сокровища обретоша един образ Пречистыя Богоматере с Предвечным Младенцем, на руку Ея держимым, Господом Иисусом, к Немуже ты денно и нощно воспевал еси: Аллилуия.

### **Икос 4**

---

Слышим и веруем, преподобне отче Ниле, яко Бог тебе, любящему Его, дарствует толика воздаяния, ихже око не виде и ухо не слыша, и яже на сердце человеку не взыдоша. Желаяще же и мы твоими богоприятными молитвами таяжде получитьи, вопием ти:

Радуйся, желания твоего совершенное  
получивый исполнение;

Радуйся, на еже верою взирал еси, ныне  
лицом к лицу неприступнаго Божества славу  
созерцаеши.

Радуйся, яко оттуду неизреченныя радости и  
веселия почерпаеши исполнение;

Радуйся, яко ктому не приключится что тебе  
желати и хотети во веки.

Радуйся, яко ктому не приразится к душе  
твоей прилог вражиих наветов и искушений;

Радуйся, яко корабль твой управил еси на  
место воистинну доброе.

Радуйся, яко стал еси им, аки на горах  
Араратских, на самых горах небесных;

Радуйся, яко ктому уже он не боится  
потопления.

Радуйся, яко ум твой укреплен есть во веки  
благодатным укреплением;

Радуйся, яко обогатился еси преизобильно  
дарами Божественными.

Радуйся, яко до возглашения архангельских  
труб имаши душевное Боговидение;

Радуйся, яко егда по возглаголению их мертвии от гробов воскреснут, и ты востанеши с телом сим к лицезрению Божию.

Радуйся, преподобне отче Ниле, Столобенский чудотворче.

### **Кондак 5**

---

Боготечная яко звезда явился еси, преподобне, во острове Селигера езера; ибо вся окрестная страны данною ти от Солнца правды, Христа Бога, благодатию озаряеши, и на мори страстного сего жития обуреваемых наставляеши пособием молитв твоих на путь спасения, к небесному отечеству ведущ, и научаеши едиными усты и едином сердцем с тобою воспевати в Троице славимому Богу: Аллилуия.

### **Икос 5**

---

Видел еси, преподобне, яко в мире сем всяческая суть суета и вся тлению причастна: преходит бо мир и похоть его; уразумел же еси, яко творя и волю Божию, тою един пребывает во веки; сего ради, бегая мира и сродник твоих, вседушно потщался еси благоугодити

превечному Богу. Темже за тоlikое твое усердие услыши нас, присно глаголющих тебе сицевая:

Радуйся, орле небопарный, крилами Богомыслия возлетьевый зрети немерцающую светлость Солнца правды, Иисуса Христа;

Радуйся, уме чистейший, не осквернившийся прелестями мирскими.

Радуйся, крине чистаго обоняния;

Радуйся, постников воздержание.

Радуйся, благочестия столпе непоборимый;

Радуйся, честное духовное сокровище.

Радуйся, светлое добродетелей приятище;

Радуйся, дражайший сосуде благодатнаго сокровения.

Радуйся, скорбящих радости и утешение;

Радуйся, путешествующих путеводителю.

Радуйся, безмездный врачу болезней всяких;

Радуйся, скорый заступниче обидимых.

Радуйся, преподобне отче Ниле, Столобенский чудотворче.

## Кондак 6

Проповедует самое место пустынное, преподобне отче Ниле, на немже до конца жизни твоя подвизался еси, каковы бяху твои труды, подвизи и терпение, яко во всю жизнь твою не имел еси ни когоже соскорбящаго и утешающаго тя в терпении, но паче отвсяду належаху ти озлобления, воздвизаемая от врага невидимаго; не терпя бо завистник богоугоднаго жития твоего зрети, некогда наустити подобных себе келию твою сожещи и с тобою, но ты, якоже на него самаго, тако и на вся его злокозненные сети, имел еси поражающъ камык, яко Давид на Голиафа, непрестанную ко Господу Богу песнь: Аллилуия.

## Икос 6

Возсия всему миру добродетелей твоих просвещение, преподобне отче, о нихже благодаряще, прославляем Отца Небеснаго, давшего ти толикую благодать величия Своего, и тебе, яко теплому о нас молитвеннику, радостная воспеваем сице:

Хор: Радуйся, усердный исполнителю Божиих велений;

Радуйся, терпением твоим удививый ангелов  
и человеков.

Радуйся, притекающим под кров твой  
сладкое упокоение;

Радуйся, изнемогающим от трудов  
возстановление.

Радуйся, источнике чудес обильный;

Радуйся, во всяких нуждах призывающим тя  
скорый помощник.

Радуйся, надеющимся на тя защитение  
непостыдное;

Радуйся, всем притекающим к тебе  
пристанище небурное.

Радуйся, хотящим твоему непорочному  
житию последовати укрепителю;

Радуйся, свещник, горяй светом  
благочестия.

Радуйся, путевождю во тьме неверия  
блудящим;

Радуйся, подателю разума буим.

Радуйся, преподобне отче Ниле, Стоlobенский  
чудотворче.

## Кондак 7

---

Хотя, преподобне, от здешняго века преставитися прелестнаго, на всяк день исходя слезил и рыдал еси над гробом твоим, не аки бояся смерти, яже таковым угодником Божиим, яко ты еси, единым есть прохождением от трудов на упокоение, от скорбей и болезней на вечную радость и веселие; но паче желая разрешитися от юз плотских и предстати Престолу Бога Вседержителя со Архангелы и Ангелы, и вкупе с ними торжественно воспевати песнь: Аллилуия.

## Икос 7

---

Нова вся явишася тебе, преподобне, егда разлучился еси повелением Господним от привременных: небо ново, земля нова и град Иерусалим нов предуготован от Бога, яко невеста украшенная мужу своему, в негоже с неизреченным веселием восприялся еси в сожитие вечное Ангелом и всем святым. Мы же, о таковом твоём преселении веселящеся, умильно глаголем сице:

Радуйся, единого Бога в триех Лицах сподобивыйся лицезрения;

Радуйся, в число приятый истинных Его поклонников.

Радуйся, яко не ктому с земными, но и с небесными силами на Престоле неприступная славы Седящему поеши: Свят, Свят, Свят Господь Саваоф;

Радуйся, яко от Него почерпаеши преизобильная благодати исполнение.

Радуйся, и на земли Богом собранного твоего стада бодрый хранителю;

Радуйся, всем подражающим житию твоему святому наставниче.

Радуйся, яко укрепляеши последующих ти к мужественному со врагом борению;

Радуйся, яко ходатайствуеши им венцы, достойныя трудов и подвигов, от Христа Бога.

Радуйся, надеждо им известная, яко не всеу теши и ни вотще трудиться им подобает;

Радуйся, яко и в течении служиши им прохладою и утешением.

Радуйся, яко сам правы стези Господни соделал еси;

Радуйся, яко и всех темиже стезями шествовати научаеши.

Радуйся, преподобне отче Ниле, Столобенский чудотворче.

### **Кондак 8**

---

Хор: Странное слышание во ушию нашею обносится о тебе, преподобне отче Ниле: се бо толик дар имел еси во плоти от Бога, яко еже и втайне содеянное от человек разумел еси, и окаянна греховною нечистотою абие обличил еси, поучая не творити того более. Мы же, сицевому твоему прозрению дивящися, прославляем Бога, прославляющего таковыя верныя Своя рабы, и вопием Ему: Аллилуия.

### **Икос 8**

---

Диакон: Всего себе, елико мощно, повинул еси воли Божией, преподобне отче; темже и от Бога вся елика желал, восприял еси, от нас же, яко отец и наставник наш, услыши и приими похвальное сие пение:

Радуйся, преподобне, яко душа твоя святая по желанию твоему ныне в небесных скиниях обретается;

Радуйся, яко во мзду приемлет упокоение и отраду.

Радуйся, яко во стране онаго веселия неизреченную сладость вкушаеши;

Радуйся, яко той сладости человеку смертному не леть есть и глаголати.

Радуйся, яко тоя доброты и благости око человекочо не виде и ухо не слыша;

Радуйся, яко с преизобилием паче желания и хотения получил еси утешения.

Радуйся, техже благих и нам ходатаю присный;

Радуйся, от твоих благодатных даров и нам подателю независтный.

Радуйся, яко промысляеши о нашем спасении;

Радуйся, яко ты печешися о добродетельнем нашем совершении.

Радуйся, яко тобою ум наш в Богомыслии научается;

Радуйся, яко тобою мрак неведения прогоняется.

Радуйся, преподобне отче Ниле, Столобенский чудотворче.

### **Кондак 9**

---

Всяко слово к похвалению ангелоподобнаго жития твоего недовольно зрим быти, преподобне отче: како бо можем того по достоянию ублажити, егоже Сам Бог дивно прославляет? Тело бо его, на земли тлению непричастное, чудес реки источает, всякия целит болезни и бесы прогоняет, душа же его святая с двадесять четырьми старцы поет вечно в небеси Седящему на Престоле: Аллилуия.

### **Икос 9**

---

Витий краснословесных не может быти тако действительно, еже бы возбудити каковаго грешника к покаянию, якоже твое сильно и действенно бысть, преподобне, едино мание: егда бо узрел еси грядуща к тебе человека, углубнувши в плотских нечистотах, абие затворил еси от него оконце келии твоея, не аки гнушаяся грешника, но являя, коль мерзит Духу Святому душа, повинная греху; тойже умилился покаяся и обещася ктому душу и тело чисто соблюдать. Мы же, радуящеся, яко имеем тя о

покаянии нашем усердного промыслителя,  
взываем ти таковая:

Радуйся, наш истинный наставниче;

Радуйся, яко чесому учил еси, та и сам  
неленостно творил еси.

Радуйся, яко за сие велий во Царствии  
Небесном наречен еси;

Радуйся, яко удостоен еси внити в число  
девствующих и последующих Агнцу на горе  
Сионстей.

Радуйся, столпе благочестия и утверждение;

Радуйся, твердое православия правило.

Радуйся, вся заповеди Господни совершенно  
сохранивый;

Радуйся, Христа ради вся оставивый и вся в  
Нем обретый.

Радуйся, яко пользою твоих дел, аки  
пресладкими плоды, верных души питаеши;

Радуйся, яко в меру добродетелей твоих  
текущих наставлявши.

Радуйся, житию нестяжательному Христа  
ради научивыйся;

Радуйся, заповедь Христову: “Не можете работати Богу и мамонне”, добре исполнивый.

Радуйся, преподобне отче Ниле, Столобенский чудотворче.

### **Кондак 10**

---

Спасти хотя душу твою, преподобне, всячески о телеси небрега еси: не имеяше бо оно у тебе во всю жизнь твою упокоения ни седением, ни на земли лежанием; но вместо упокоения бяху телесную слабость поддерживающе жезли, и тако путь многоскорбнаго жития сего совершил еси; чесо ради тело твое оставил еси нам нетленно и многочудесно в подражание твоих подвигов, душею же предстал еси Престолу Владычню, с лики Святых воспевати: Аллилуия.

### **Икос 10**

---

Стена явился еси, преподобне отче Ниле, во искушениях вражиих нас утверждающая; якоже бо древле израильтяном повеле Бог вознести змию в пустыни на древо, да уязвеннии от змиев, на ню взирающе, исцеляются; тако и ты предложил еси себе нам, да егда который брат по навету вражию каковою-либо страстию

побежден будет, абие взирал бы на твои чудеса  
обогащенное тело и исцелевался: ибо и ты  
таковую же плоть и темже страstem  
подлежащую имел еси, якоже и мы, но  
благодатию Божиею победитель всех страстей  
явился еси. Сего ради торжествующе память  
твою, воспеваем сие:

Радуйся, преподобне, древняго врага  
человекоубийцу диавола со всеми его  
хитростями посрамивый;

Радуйся, во всю жизнь твою малейшаго  
угождения плоти не явивый.

Радуйся, ни каковыяже дружбы с миром не  
имевый;

Радуйся, преславную над оным победу  
одержавый.

Радуйся, воздушная мытарства князя тьмы  
безбедно прошедый;

Радуйся, лаяния мысленных псов не  
слышавый.

Радуйся, яко супостат наш диавол не обрете,  
что на тя клеветати;

Радуйся, яко вся его сила на воздушех  
пришествием твоим посрамится и уничижится.

Радуйся, яко восходяща ты в небесное отечество сретоша небеснии Ангели и Архангели;

Радуйся, яко узревше ты вси Святии возрадовашася.

Радуйся, яко сподобился еси услышати прелюбезный сей глагол: “Прииди, сыне благословенный, наследуй уготованное ти Царство”;

Радуйся, сего вожделеннаго жребия и нам присный ходатаю.

Радуйся, преподобне отче Ниле, Столобенский чудотворче.

### **Кондак 11**

---

Пение всеприятное приносил еси Богу, преподобне отче Ниле, паче жертв и всесожжений, от сердца сокрушенна и смиренна, пламенем любви воспаряющее в молитве, яже выну восхождаше во уши Господа Саваофа, яко и тебе самага сильна явился вознести на небо и поставить пред Престолом Славы Его, идеже вечно воспеваеши Ему: Аллилуия.

## Икос 11

Света безвиновного причастием  
насладивыйся, преподобне отче Ниле,  
светильник мысленный явился еси нам,  
блудящим во греховней тме, наставляяй  
правыми стезями шествовати ко свету  
самобытному, Христу Богу нашему. Мы же,  
елико мощно, шествующе по тебе, яко  
предводители и руководце нашем,  
благодарственная восклицаем сице:

Радуйся, церковный неугасимый  
светильниче;

Радуйся, ко свету Богу Отцу в сыновство  
причтенный.

Радуйся, ко свету Богу Сыну братство  
благодатию Его стяжавый;

Радуйся, от света Бога Духа Святаго  
восприявый обручение живота вечного.

Радуйся, яко вся, елика хочещи, от онаго  
триипостаснаго света заимствуеши;

Радуйся, яко и нас благодатным светом  
просвещаеши.

Радуйся, яко ради твоих за нас пред  
Престолом Божиим молитв, и мы при исходе от

жизни сея надеемся избежать зренья мрачнаго лица демонскаго;

Радуйся, яко при твоём светении и мы безбедно приити уповаем до горы небесныя.

Радуйся, яко тебе, нас руководствующа, устрашится князь тмы, не терпя зрети светлости лица твоего;

Радуйся, яко от света твоего вся простертыя на нас сети его, аки паучина, исчезнут.

Радуйся, яко мы, тобою руководими, надеемся приити ко оному незаходимому свету, Христу Господу;

Радуйся, яко тобою наставляеми, и мы веруем быти причастницы славы Его.

Радуйся, преподобне отче Ниле, Столобенский чудотворче.

### **Кондак 12**

Благодать не престай изливати, преподобне отче Ниле, на место, идеже постническаго жития твоего течение совершил еси, и идеже прежде кончины твоея возвестил еси духом пророческим быти иночествующим вселению: се бо, по предречению твоему, мы zde вселихомся, zde и покой наш. Ты же, яко отец и наставник,

укрепляй ны и помогай нам до конца жизни  
нашея душеспасительную песнь воспевати  
Господу Богу: Аллилуия.

## **Икос 12**

---

Поюще твоя иноческия подвиги, ублажаем  
бдения, непрестанные молитвы, пост, смирение  
и терпение, преподобне отче Ниле; но обаче  
вемы, яко, аще бы и тмочисленными устнами  
могли тя ублажити, ни коеже слово довольно  
будет на похвалу твоих преславных  
добродетелей. Тойже бо Един силен тя по  
достоянию прославити и ублажити, Иже  
глаголет: “Прославляющия Мя прославлю”. И  
ныне убо, яко торжественный победитель врагов  
спасения, прославляйся и седи на Престоле с  
двоюнадесятьми старцы, от нас же чад твоих,  
аще и малое, обаче приими приношение сие:

Радуйся, готовнейший защитниче во обидах  
сущим;

Радуйся, крепкий щите от льстиваго и  
клеветливаго языка.

Радуйся, отвратителю от грешников  
праведнаго гнева Божия;

Радуйся, кающихся грешников скорый пред Богом заступниче.

Радуйся, в последней беде смертной паче надежды помощниче;

Радуйся, добрый пастырю овец Христовых.

Радуйся, яко молитвами твоими воспящаеши древнему человекоубийце диаволу в кознях его противу рабов Божиих;

Радуйся, яко, ихже он мнится имети во своей власти, и тех исторгаеши.

Радуйся, яко пособием твоих молитв безнадежнии и отчаяннии надежни бывают;

Радуйся, яко тебе, их руководствующу, и они Царствие Небесное улучшить чают.

Радуйся, яко тебе, их защищающу, вражия стрелы тех не уязвляют;

Радуйся, яко при твоей помощи они сами врага устрашают.

Радуйся, преподобне отче Ниле, Столобенский чудотворче.

### **Кондак 13**

---

О великий угодниче Христов, преподобне отче Ниле! Во многих потребных нам

недостаточни есмы, обаче многая и нуждая оставивше, о едином тебе ныне молим и просим: ходатайствуй и моли о нас Господа нашего Бога, да в день всемирнаго суда сподобит ны деснаго стояния и сопричтет лику торжествующих воспевати вечно Ему песнь: Аллилуия.

Этот кондак читается трижды, затем икос 1-й и кондак 1-й

### **Молитва 1**

---

О великий угодниче, преславный чудотворче, собранного zde о тебе стада Христова бодрый пастырю и обители сея Богом данный начальниче, Ниле всеблаженне! Душею на небеси Престолу Божию предстояй и Троичныя славы наслаждайся, телом же на земли в Божественном храме сем почиваяй и от него данною ти свыше благодатию различная источаяй чудеса, призри милостивым оком на предстоящия честней твоей раце люди и просящия сильныя твоя помощи. Се бо мы в безмерных согрешениях осквернившиися и в тине страстей присно валяющися, праведный гнев Божий на себе наведом и всякия милости недостойны сотворихомся; темже и не смеюще возвести очес наших к высоте небесней, ниже

вознести молебный глас, сердцем сокрушенным и духом смиренным тебе в ходатайство и пособие призываем. Ты убо, яко стяжавый дерзновение, воздвигни горе преподобныя твоя руце, якоже иногда чудный оный Моисей Боговидец Амалика побеждая, и простер к Господу Творцу всех и Богу теплую свою молитву, испроси Церкви благостояние, воздуха благорастворение, земли плодоносие. Избави же всех, верою несумненною к Богу приходящих и многоцелебныя мощи твоя благоговейно почитающих, от всяких бед душевных и телесных, от всех томлений и прилогов диавольских. Буди печальным утешитель, недугующим врач, напастуемым помощник, нагим покровитель, вдовицам заступник, сирым защитник, младенцем питатель, старым укрепитель, странствующим путевождь, плавающим кормчий и исходатайствуй всем, крепкия помощи твоя усердне требующим, вся яже ко спасению полезная. Яко да твоими молитвами наставляеми, путь на земли маловременнаго жития нашего безбедне совершим, улучим же на небеси нескончаемый покой и прославим купно с тобою всех благих Дателя, единого в Троице славимаго Бога Отца и

Сына и Святаго Духа, ныне и присно, и во веки веков. Аминь.

## Молитва 2

О преподобне и богоблаженне, пастырю и начальниче, отче Ниле! Ты убо, яко имея ко Владыце Христу дерзновение и ко Пречистой Его Матери, Пресвятой Богородице, буди молитвенник и помощник и ходатай о нас, недостойных рабех твоих, живущих во святей обители сей, ейже ты начальник богоизбранной дружини братству сему, и о приходящих с верою к цельбоносным мощем твоим. Буди помогая и заступая от злаго нашего сопротивника, яко, да твоими молитвами пребывающи на месте сем и приходящи с верою к раце мощей твоих и на всякомъ месте призывающи тя на помощь невредими будем от бесов и злых человек, славу и благодарение возсылающе Отцу, Сыну и Святому Духу, ныне и присно и во веки веков. Аминь.

